

Headline	'Peniaga rugi kerana parkir'		
MediaTitle	Kosmo	Language	Malay
Date	29 Jan 2024	Readership	467,988
Circulation	155,996	Page No	16
Section	Negara	Journalist	LUQMAN RIDHWAN
ArticleSize	451 cm ²		
PR Value	RM 35,247		



Kemudahan letak kenderaan ditenggelami air sejak sebulan lalu

'Peniaga rugi kerana parkir'

Oleh LUQMAN RIDHWAN
MOHD. NOR

GERIK — Peniaga di Hentian Royal Belum Amanjaya di Tasik Temenggor di sini, resah memikirkan nasib mereka apabila kemudahan parkir di kawasan itu masih tidak dapat digunakan selepas ditenggelami air sejak hampir sebulan lalu.

Ruangan parkir yang ditenggelami air akibat limpahan dari Tasik Temenggor termasuk banjir menyebabkan rata-rata peniaga menanggung kerugian akibat kekurangan pelanggan.

Pengerusi Persatuan Anak Gerik, Tajuddin Mohd. Ali berkata, masalah itu menjelaskan punca pendapatan para peniaga kerana ia menyebabkan orang ramai tidak datang ke sana biarpun pada hari cuti seperti hujung minggu.

Menurutnya, biarpun mempunyai ruang parkir yang selamat, namun jumlahnya tidak mencukupi selain dipenuhi kendaraan para pelanggan houseboat.

"Apabila perkara ini berlaku, para peniaga hanya mampu memperoleh antara RM60 hingga RM100 sahaja sehari. Memang rugi, bahkan nak bayar gaji pekerja pun tak mampu," katanya kepada Kosmo! di sini semalam.

Katanya, para peniaga tiada pilihan selain membuka perniagaan kerana kegagalan membuka premis akan berdepan tindakan daripada Majlis Daerah Gerik.

"Tidak lama lagi musim cuti sekolah dan menjadi satu kerugian bagi mereka sekiranya tempat parkir itu masih ditenggelami air. Kami tidak menyalahkan mana-mana pihak tetapi cuma berharap tindakan segera dapat diambil," katanya.



TEMPAT letak kenderaan di hadapan Hentian Royal Belum Amanjaya, Tasik Temenggor, Gerik yang ditenggelami air sejak sebulan lalu.

“

Apabila perkara ini berlaku, para peniaga hanya mampu memperoleh antara RM60 hingga RM100 sahaja sehari. Memang rugi, bahkan nak bayar gaji pekerja pun tak mampu."

TAJUDDIN MOHD. ALI

Sementara itu, Pegawai Daerah Hulu Perak yang juga Yang Dipertua Majlis Daerah Gerik, Mohd. Zairasyahli Shah Zakaria berkata, paras air di Tasik Temenggor kini direkodkan para paras 246.88 meter (m).

Beliau berkata, pihak Tenaga Nasional Berhad (TNB) sedang berusaha menurunkan aras air empangan secara perlahan-lahan dan teratur melibatkan kesemua empangan yang ada dari Temenggor sehingga ke Chenderoh.

"Empangan Temenggor tidak mempunyai sistem bukaan seperti empangan yang lain. Ia menggunakan kaedah spillway apabila aras air mencecah 248m.

"Pelepasan terkawal di Temenggor adalah dengan menjana tenaga di sana pada kadar yang tinggi dan juga meningkatkan penjanaan di tiga stesen dalam rangkaian Sungai Perak di samping menjalankan pelepasan air terkawal jika perlu di tiga stesen tersebut," katanya.